



**Komunikadu Imprensa**  
**Munisípiu Baukau**  
**23 Fevereiru 2024**

**JSMP kontinua haluan/haboot nia programa Apoiu Seguransa  
Komunitáriu (PASK) iha Suku Uma-Ana-Iku**

Iha 15 Fevereiru 2024, JSMP realiza seremónia asina Nota Entendimentu ho autóridade Suku Uma-Ana-Iku, Postu Administrativu Venilale, Munisípiu Baukau ba períodu fulan neen iha tinan 2024.

“Importante tebes hodi haluan/haboot PASK ne’e ba suku sira seluk inklui Suku Uma-Ana-Iku tanba tuir rezultadu peskiza ne’ebé JSMP ho TAF halo iha tinan kotuk hatudu katak comunidade barak susar tebes atu asesu sira nia diretu ba justisa no iha regra aplikável sira iha suku ne’ebé persiza harmoniza ho Lei Nasionál. Alende ne’e, agradese tebes ba estrutura suku Uma-Ana-Iku ne’ebé simu JSMP hodi serbisu hamutuk ba programa ne’e”, dehan Sra. Ana Paula Marçal Diretora Ezekutiva JSMP.

Asinatura ba nota entendimentu ne’e JSMP representa hosi Diretora Ezekutiva, Sra Ana Paula Marçal no Autóridade Suku Uma-Ana-Iku representa hosi xefi suku, Sr. Antoninho da Costa Freitas.

Objetivu hosi asina nota entendimentu ne’e atu asegura komunikasaun no koordinasaun ne’ebé di’ak entre parte rua durante implementasaun Programa Apoiu Seguransa Komunitáriu (PASK) no asegura implementasaun programa ho di’ak no tuir duni objetivu programa ne’e rasik.

Iha intervensaun Administradór Postu Administrativu Venilale Sr. Jose Freitas Boavida haktuir katak agradese tebes ba JSMP no konsidera programa ne’e importante tebes ba comunidade. Antes ne’e programa ida ne’e realiza deit iha Suku Uma Ana-Ulu maibé iha tinan ida ne’e JSMP haluan-tan programa ne’e mai iha suku Uma-Ana-Iku tanba ne’e husu ba JSMP atu nafatin kontinua tan programa ne’e ba suku seluk. Administradór nia odamatan nakloke durante oras 24 bainhira entidade sira Governu nian ka ONG sira hakarak mai dezenvolve comunidade iha Postu Venilale.

Iha parte seluk intervensaun hosi komadante Eskuadra Venilale, Sr. Sebastião Freitas haktuir katak PNTL Eskuadra Venilale prontu apoiu no kolabora serbisu hamutuk JSMP hodi bele implementa programa JSMP nian iha suku tarjetu sira, tanba konsidera programa ne’e importante tebes no bele ajuda lideransa suku sira no comunidade asesu ba justisa.

Nune’e mós, Xefe suku Uma-Ana-Iku, Sr. Antoninho da Costa Freitas iha nia intervensaun ható’o agradese wa’in ba JSMP, tanba bele hili ona Suku Uma-Ana-Iku hodi serbisu hamutuk ba implementasaun programa ne’e. Estrutura

tomak suku ne'e nian pruntu atu kolabora tanba konsidera programa ne'e importante tebes no bele fasilita comunidade sira bele asesu ba informasaun sira relasiona ho comunidade nia direitu asesu ba justisa.

Xefe suku hatutan liután katak iha Suku Uma-Ana-Iku iha problema barak no comunidade sira seidak iha koñesimentu atu lori sira nia kazu ba iha justisa formál tanba ne'e konsidera prezensa JSMP nian ne'e importante no espera katak bele tulun comunidade atu asesu ba justisa formál.

Programa ne'e ho nia objetivu atu tulun comunidade lokál sira no intervenente sira iha sistema justisa nasionál hodi hadi'ak ligasaun entre nia sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polísia, tribunál, prokuradoria ba iha suku sira tarjeitu
4. Advokasia atu hadi'ak liután ligasaun comunidade sira ho justisa formál
5. Fahe informasaun kona-ba asesu ba sistema justisa formál
6. Introdús *Case Log* ba konsellu suku sira no OPS

Iha seremonia asina MoU ne'e partisipa hosi Administradór Postu Administrativu Venilale, komadante PNTL Eskuadra Venilale, representante TAF, xefe aldeia sira hosi aldeia ha'at (4), lia-nain, delegada feto no mane, Joven feto no mane, Makaleha Maksabar, Katuas uma-lisan no OPS Suku Uma-Ana-Iku.

Atividade ne'e, realiza hosi JSMP, liuhosi Programa Apoiu Seguransa Komunitária (PASK) tanba serbisu hamutuk ho The Asia Foundation (TAF) ne'ebe finansia hosi Embaixada Nova Zelândia iha Timor -Leste.

Atividade ne'e realiza hosi JSMP liuhosi PASK tanba serbisu hamutuk ho The Asia Foundation (TAF) ne'ebé Finansia hosi Embaixada Nova Zelândia iha Timor-Leste.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

